

INFORMACIJE O PROJEKTU I PROGRAMU ZA DIJASPORU

Općina Zavidovići je uz finansijsku podršku Ministarstva za ljudska prava i izbjeglice BiH – Sektor za iseljništvo, uz podršku i saradnju BKC Sloga Wiltz, Associazione Bosniaca Ljiljan, JU Centar za kulturu Zavidovići, SNIK „Atom“ Zavidovići, UG Planinarsko društvo „Tajan 1929“, Agencija lokalne demokratije Zavidovići (ALD) i drugim NVO i subjektima sa područja lokalne zajednice, osmislila projekat pod nazivom „Saradnja sa iseljništvom za razvoj lokalne zajednice“.

Riječ “razvoj” u nazivu projekta koristimo prije svega kao izraz za razvoj “ljudskih” veza dijaspori i lokalne zajednice a ostali “razvoji” onda neminovno dolaze uz stalnu zajedničku saradnju i kreiranje povoljnog ambijenta za ekonomski razvoj i svakodnevni život.

Cilj projekta je uspostava čvršćih veza sa dijasporom u emotivnom, kulturnom, nacionalnom, jednom riječju ljudskom smislu, pa onda i u ekonomskom. Nastojanje je da se u lokalnim okvirima, dijaspora prestane doživljavati samo kao izvor pomoći i s druge strane da naša dijaspora, sa neupitnim pravom, prihvati Općinu Zavidoviće u punom kapacitetu kao nešto neotuđivo svoje, pogotovo mladi koji su rođeni ili odrastaju u inostranstvu. Uz navedeno, nastojanje je da se putem dokumentarnog filma, posebno urađenog za ovu priliku, sa prevodom na tri strana jezika, predstave određeni potencijali Zavidovića kao poziv i informacija mogućim investitorima iz inostranstva i iz reda dijaspori te kao predstavljanje Zavidovića putem naše dijaspori građanima zemalja privremenog boravka

Navedene ciljeve i zamislili smo ostvariti kroz višednevni program sa različitim sadržajima

Realizacija projekta:

Putem udruženja naših građana u Italiji i Luxemburgu (Wiltz) te pojedinačnih prijavi i pozivanja iz ostalih zemalja privremenog boravka okupiti bar 50 porodica odnosno više stotina naših građana iz dijaspori oko ovog, za dijasporu osmišljenog, programa. Okupiti što više mladih iz dijaspori. Broj uključenih ne može biti preveliki.

Pozivamo sve zainteresovane da nam najkasnije do 09.08.2021.godine najave učešće i broj osoba sa sobom u cjelokupnom programu ili dijelu programa bilo kojeg programskog dana, sa naznakom treba li prevoz, kako bi mogli planirati potreban prevoz, ishranu, vodiče i dr.

Za programske sadržaje i aktivnosti, osim za Konferenciju prvog dana, broj učesnika nije ograničen.

Napominjemo, u sve planirane aktivnosti nastojati uključiti što više djece i mladih iz porodica “dijaspori” uz djecu i mlade koji stalno žive u Zavidovićima (pojedinci volonteri i članovi NVO)

Program je predviđen za 4 dana. Programske aktivnosti su:

- 11.08. (srijeda): 11,00 sati - Premijera dokumentarnog filma “Potencijali Zavidovića” i Konferencija zvanica iz dijaspori, lokalnih privrednika i drugih učesnika o turističkim i drugim privrednim potencijalima Zavidovića i ulozi dijaspori u lokalnom razvoju (“dijaspora kao ambasador”).

(mjesto: Park prirode "Tajan" – konferencijska sala Golf kluba na terenu u Mitrovićima);

U prostoru namijenjenom za održavanje konferencija u objektu na golf terenu u Mitrovićima organizovati Konferenciju za gore navedene učesnike. Broj učesnika je ograničen. Organizator će uputiti određen broj pozivnica a očekujemo i samostalno prijavljivanje za učešće na konferenciji po kojem će biti dostavljena pozivnica.

U prvom dijelu konferencije bit će premijerno prikazan dokumentarni film, posebno urađen za ovu priliku, sa prevodom na tri strana jezika. Nosilac i realizator projekta izrade filma je SNIK "Atom" Zavidovići. Isti će biti podijeljen prisutnima iz dijaspore a može se koristiti kao svojevrsna reklama i promocija u zemljama privremenog boravka, a kao video materijal za dopunske škole i slično.

Učešće na konferenciji je najavljeno i od strane predstavnika Ministarstva za ljudska prava i izbjeglice BiH – Sektor za iseljništvo, gostiju iz Italije, zatim implementatora USAID projekata iz ove oblasti, predstavnika drugih općina i dr. Aktivno učešće se očekuje od naših povratnika koji su uspjeli razviti vlastiti biznis (primjeri dobre prakse i prijedlozi za poboljšanje uslova poslovanja)

- **12.08. (četvrtak) 09,00 sati:** - Posjeta nacionalnim spomenicima, kulturno-historijskom i prirodnom naslijeđu općine Zavidovići,
 - **(19,30 sati)** Kulturno zabavno veče – koncert ansambla "Divanhana" na otvorenom;

Planirana je grupna posjeta, organizovanim autobuskim prevozom, nacionalnim spomenicima manastir "Vožućica", "Krivajina Vila", Stara džamija u Rujnici I lokalitetu kamenih kugli "Grab potok".

U večernjim satima (19,30) u parku JU Centar za kulturu Zavidovići, u čast naše dijaspore, bit će održan koncert BH benda "Divanhana" sa slobodnim pristupom za sve građane. Prije početka koncerta realizuje se program za djecu "Igrobus".

- **13.08. (petak po podne) 17,00 sati** - Sportske aktivnosti – revijalni sportski susreti lokalnih klubova i ekipa dijaspore, kulturno zabavni sadržaj za mlade;

Po naknadno tačno utvrđenom terminu planira se upriličiti sportski sadržaj na stadionu NK "Krivaja" uz učešće i ekipa iz dijaspore. Planirane su nogometne utakmice i odbojkaška utakmica (OK "Krivaja"). Nakon ovih aktivnosti planira se organizacija druženja mladih Zavidovića i mladih iz dijaspore.

- **14.08. (subota) 08,00 sati:** - Sajam domaćih proizvoda i rukotvorina,
 - igraonica za djecu,
 - 10,00 sati:** - druženje dijaspore u Parku prirode "Tajan" na lokalitetu kampa PD "Tajan" sa organizovanim grupnim posjetama jezeru Mašica i speleološkim objektima (posjeta turističkim lokalitetima i motivima).

Od jutarnjih sati, na prostoru šetnice (lijeva obala rijeke Bosne) između dva mosta, organizuje se sajam/izložba domaćih proizvoda i rukotvorina, izložbeno prodajnog karaktera i drugi sadržaji. Nosioци ovih aktivnosti su ALD Zavidovići, "Agro Dolina", pet udruženja žena i drugi uspješni izlagači sa zanimljivom ponudom proizvoda.

Za 10,00 sati planirano je okupljanje pored JU Centar za kulturu i polazak u Park prirode "Tajan" do kampa PD "Tajan" Zavidovići, u Mitrovićima, 22 km od Zavidovića.

Sa ovog mjesta, prema broju zainteresovanih organizovat će se grupne posjete jezeru Mašica i speleološkim objektima (pećina u "Srednjoj stijeni") uz obezbijeđen prevoz terenskim vozilima uz stručnu pratnju članova SNIK "ATOM" i GSS Zavidovići. Moguća organizacija sportsko- zabavnih sadržaja za mlade. Planiran je zajednički ručak za sve prisutne.

Ukoliko se tokom navedena 4 dana iskaže interes za planinarski pohod na Tajan ili neku drugu aktivnost ista će se nastojati organizovati u dogovoru sa zainteresovanim građanima iz dijaspore.

Sve aktivnosti i obilasci će biti praćeni i distribucijom namjenskih promotivnih materijala.

Poštovani, molimo Vas da ovaj akt učinite dostupnim Zavidovićanima ma gdje bili.

Od vas očekujemo mišljenje o svemu navedenom uključujući primjedbe i sugestije.

Uglavnom, bez pomoći i odziva Zavidovićana iz dijaspore projekat neće dati željene rezultate a želja i obaveza nam je da promijenimo stvari na bolje.

Zavidovići, 26.07.2021.godine